

新元史

第五一册

列傳第一百

新元史卷之二百零二

賜進士出身日講起居注官翰林院侍讀國史館纂修膠州柯劭忞撰

王利用

劉事義

郭明德

馬煦

韓若愚

尉遲德誠

劉德溫

吳鼎

劉潤

陳端

卜天璋

王良

吳恭祖

宋崇祿

王利用字國賓通州潞縣人遼贈中書令籍之七世孫

高祖以下皆仕金利用幼穎悟弱冠與魏初同學遂齊名初事世祖於潛邸中書省辟爲掾辭不就中統初命監鑄百司印歷太府內藏官出爲山東經畧司詳議官遷北京奧魯同知歷安肅汝蠡趙四州知州入拜監察御史薊州有禁地民不得射獵其中邏者誣州民冒禁籍其家利用糾之邏者訴於上利用辯愈力卒以所沒入悉歸之民擢翰林待制兼興文署奉命程試上都隆興等路儒士遷直學士與耶律鑄同修實錄出爲河東陝西燕南三道提刑按察副使四川提刑按察使都元帥塔海抑巫山縣民數百口爲奴民屢訴不決利用承

檄覆問盡出爲民大德二年改安西興元兩路總管在興元減職田租額站戶之役於他郡者悉除之有婦毒殺其夫問藥所從來吏教婦指爲富商所貨獄上利用曰家富而貨毒藥豈人情乎卒雪其冤未幾致仕居漢中武宗卽位起爲太子賓客首以切於時政者疏上十七事曰謹畏天戒取法祖宗孝事母后敬奉至尊撫愛百姓敦本抑末清心聽政寡欲養身酒宜節飲財宜節用有功必賞有罪必罰杜絕讒言求納直諫官職量材而授工役相時而動近侍時赴經筵講讀經史帝及皇太子皆嘉納之皇后聞之命錄別本以進利用以老病

不能朝帝遣醫診視之利用謂弟利貞利亨曰吾受國厚恩愧不能報死生有命藥不能爲也遂卒年七十七利用每自言平生讀書深得力於恕字廉希憲當時名相簡重慎許可嘗語人曰方今文章政事兼備者王國賓其人也仁宗卽位以宮僚舊臣贈榮祿大夫柱國中書平章政事追封潞國公諡文貞

劉事義字伯宣濟南鄒平人曾祖信其母失明信日汲井水浸舌舐之月餘遂愈人謂孝思所感祖震有學行爲嚴實行臺令實雅重之後擢鄒平縣詳議官又改監本府稅父壁京畿都漕運司知事遷經歷時漕司贓私

狼籍至以空鑰相授受壁盡革其弊冒濫無所施時論稱其廉敏累擢建德路推官卒事義少好學鯁亮有風概由禮部掾辟中書省掾時當國者遇下嚴掾吏多罹刑辱事義以勤慎獨無所及出爲大都酒課副提舉遷禹城縣尹有訟庭決之蠹吏斂手不得爲奸利產嘉禾一莖九穗民勒德政碑紀之遷遼陽行省左右司都事累擢監察御史先是山東宣慰使樂實暴橫事義尹禹城時知其惡及爲御史發其奸狀以聞卒按誅之未幾轉中書省右司都事改秘書少監執政以秘書散局非事義所宜復奏授兵部郎中階中順大夫又以大都宣

課提舉司所入多不實命事義監之稅課果增倍蕝賁
銀幣有差遷太中大夫浙西廉訪副使改兩浙鹽運使
以病去官起爲陝西行臺治書侍御史改嘉議大夫湖
南廉訪使至治三年拜江南行臺治書侍御史晉中奉
大夫改陝西行臺侍御史又拜陝西行省參知政事卒
年六十七

郭明德字德新中山無極人至元初大兵圍襄陽募民
兵明德應募中選縣尹馮帖試以策論署爲總管府掾
從討乃顏擢斷事官知事大德初累遷工部員外郎五
年京師大水蘆溝河決牙梳堰中書省檄明德塞之伐

荊爲巨圍實石於中以殺水勢堤遂固六年叛王海都入寇拜宣慰副使上疏陳邊備曰安邊之策務在屯田積穀且耕且戰今兵屯北邊運米一石值中統鈔百餘貫使山後每歲有秋輸米者僅可供一歲之用苟或不然利害非細今和林之北地宜麥禾農器所在有之京師六衛每年抽步兵二人屯田可供八人之食和林寒苦非漢軍所能堪若於蒙古諸軍揀其富強者戍邊貧弱者教之稼穡俟其有成如漢軍法以相資養和林之錢或不足償以江浙鹽引償之則數萬之粟可坐而致矣此外別立轉運買牛萬頭車一萬兩用兵四千人月

給米三斗自大同至和林止四千里百里置一驛用兵
百人車五百兩配牛五百頭可運米二千五百石三日
一返一月運米二萬五千石何患軍需之不足也又曰
海都之衆不及國家百分之一反能爲患何哉號令不
專人心不一機會失宜故也中統初令宗王征李璫出
金銀符數十賞有功者矧今日邊防非璫可比若仍前
制授之將帥使賞罰明信則士卒可倍其勇何有於克
敵乎又曰守邊之道必當高城深塹今沿邊無城堡欲
屯田積粟以備敵是委肉於虎也近年兵少失利以應
固守之地逡巡引退千有餘里致令敵人深入今當規

度敵所必由之路或五十里或百里各築一城俟秋熟則貯芻粟於中分兵屯守如敵來攻各城抽兵救之則我有守備之資矣廷議韙之未幾謝病歸復起爲左司都事進拜同僉樞密院事至大元年卒年六十一

馬煦字得昌磁州滏陽人父和磁州提領勸農官煦幼從鄉人楊震亨學與兄曙弟昕並有時名至元初辟御史掾十五年拜行台監察御史時行省官私籍良民爲奴至萬餘家莫敢詰問煦按籍還之軍興運餉者匿粟五萬石以覆溺爲辭煦劾其侵冒時論稱之秩滿僉江西提刑按察司事二十二年除荊湖行省員外郎改瀘

州同知宋亡正江南戶口版籍期限嚴急民多驚擾煦令州民以紙疏丁口產業之實揭門外遣吏取之卽日事竣二十六年遷江淮行省理問官擢江西行省郎中值行省復爲中書盡去尙書舊吏獨留煦一人先是尙書省以聚斂病民擇甲戶主倉庫歲滿往往償累負至破產煦曰富民狃於安逸不敗何待宜以精強吏代之著爲令由是倉庫官無累負吏更以年勞進用元貞元年改山南道廉訪副使三遷爲中書左司郎中大德六年出爲濟甯路總管至大元年移湖州路富商僱舟師至他郡溺死其妻訟商殺其夫吏索商賄不與誣商抵

罪又豪客毆人至死納井中賄吏以溺聞煦皆平反其獄胡安定墓奪於浮屠煦遷葬高原爲立祠置守冢三家哈刺哈孫爲行省丞相雅敬煦使其子師事之三年召拜刑部尙書延祐三年以戶部尙書致仕是年卒年七十三兄曙河南儒學提舉弟昕國子助教

韓若愚字希賢保定滿城人由武衛府史授通惠河道所都事開河有功賜錦衣一襲遷留守司都事尋升經歷出知薊州改中書左司都事時監燒昏鈔者欲取能名槩以新燒鈔爲僞鈔使管庫者誣服獄旣具若愚知其冤覆之得免死者十餘人遷刑部郎中提舉諸路寶

鈔庫擢吏部郎中仁宗卽位故事凡潛邸官不次遷轉若愚以歲月定其資品遂著爲令皇慶元年遷內臺都事改刑部侍郎尋擢中書左司郎中時議禁民田獵犯者抵死若愚曰昔齊宣王之囿方四十里殺其麋鹿者如殺人之罪孟子非之衆以爲然遂改從輕律參政曹鼎新辭職帝曰若效韓若愚廉勤足矣何辭爲繼命若愚參議中書省事鐵木迭兒爲右丞相以憎愛進退百官恨若愚不附己羅織以事帝知其枉不聽拜戶部尙書延祐六年命理河間等路囚輕重各得其情復拜參議中書省事鐵木迭兒再入相以舊憾誣若愚罪欲殺

之帝不從復奏奪其官除名歸鄉里至治三年詔雪其
冤泰定元年命復官尋拜刑部尙書遷湖廣行省參知
政事未行改詹事丞八月命宣撫江浙留爲侍御史時
左丞相倒刺沙擅威福以事誣侍御史亦憐真等下獄
無敢言其冤者故事朝廷重臣必爲御史大夫若愚乃
奏請以左丞相倒刺沙爲御史大夫事遂解三年擢浙
西廉訪使未行拜河南行省左丞從文宗平內難進資
政大夫天歷三年遷淮西江北道廉訪使九月卒年六
十八贈資德大夫江浙等處行中書省左丞上護軍追
封南陽郡公諡貞肅

尉遲德誠字信甫絳州人祖天澤仕金爲庫官郡王帶孫拔絳州天澤降道見兵死者輒收瘞之帶孫令佩金符授霍州御衣局人匠總管父薨潞州知州德誠厯官太子率更丞至大元年改詹事院都事二年遷家令司丞仁宗以爲謹恪常賜酒帛數薦士出則未嘗語人擢家令四年選爲河東山西道宣慰司同知上計京師入見帝方食賜以餽餘擢工部尙書未拜改陝西行臺治書侍御史延祐元年遷京畿都漕運使二年拜遼東道肅政廉訪使上疏條時政曰勞諸王以篤宗親防出入以嚴宮禁立諫官以遠讒佞崇科舉以求人材立常平

以備荒年汰僧道以寬民力舉賢良以勵忠孝抑奢侈以厚風俗及拯鈔法裁冗官等事未報而卒年五十三劉德溫字純甫大都大興人初爲中書省宣使大德十一年以年勞授內宰司照磨監建興聖宮調掌儀署令未幾擢內宰司丞奉中旨徵河南逋糧德溫平其價使民輸鈔以償民便之轉延福寺丞代祀岳瀆遷同知大都路總管府事輦轂之下供億浩繁德溫措置有方民以不擾累擢同知上都留守司事省檄和糴民恐不償其值彼此觀望德溫下令曰糧入價出吏敢爲弊罪不赦於是不踰期而糧集轉大司農承德溫以耕藉之儀

未備欲考據典禮集爲一書未畢出爲永平路總管灤
漆二水爲患有司歲發民築堤德溫曰流亡始集而又
役之是重困吾民遂罷其役然水亦不復至永平古孤
竹國元初郡守楊阿台請於朝諡伯夷曰清惠叔齊曰
仁惠爲廟祀之至是德溫復奏請春秋具牢禮致祭著
爲令賜廟額曰聖清至順四年卒年六十九贈正議大
夫禮部尙書上輕車都尉朝城郡侯諡清惠

吳鼎字鼎臣大都大興人至元十七年見裕宗於東宮
命入宿衛二十五年授織染雜造局總管府副總管後
積官至禮部尙書宣徽副使大德十一年山東諸郡饑